



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim



tir yimiyim

TAPAK 8

Takum tenla agütsür mang ayangtsü: Mojtaba Khamenei

Sweden coach Potter-i tenangzüktepba yanglushi



VOL. XXIII ISSUE NO. 149 (ADOK 149) DIMAPUR ROGONÜ (FRIDAY) METSÜREMI (MARCH) 13, 2026

₹ 5.00

Mokokchung nung totzü aser LPG cylinders peria lir: MCCI

Dimapur, Metsüremi/March 12 (TYO): Mokokchung Chamber of Commerce and Industry (MCCI) ajanga Mokokchung nung aliba nüburtang dang sangdong ka nung, market nung totzü (petrol aser diesel) aser LPG cylinders agi anungba mali, ta metetdaksüogo.

Supply ajak akhi ama shidak lir, anungji nüburtang dang tsübo malitsü mesüra talila malidentsü mepishir, ta sangdong ajanga ashi.

Middle East nung tensa majungba ya asangsang aser iba yagi alima nung kongshiba tejangja lir, saka nüburtang dang osang tejangja masüba olulu nung mamangtsü ayongzük, ta MCCI-i ashi.

Petrol, diesel aser LPG densema essential commodities ajunga market nung teti ama angutsü asoshi MCCI-i inyaksü. Tarutsü nung aliba tensa tamajungba kuma mazüoktettsüsa kumra, tapet ketdangsurtem den shisa agitepa tim sangdong agütsüsü, ta ashi.

Kasa mapang Mokokchung nung aliba shishilempar ajunga dang, mulungsoa masü 'donations' meshiba 'underground' elements aliba osang lir, ta parnokisa ashi. Züngsemtem dang saksalema alitsü ayongzük aser iba ama atalokba lira tekeratiba nung MCCI office nem osang agütsüsü ajungshir, ta MCCI sangdong ajangasa ashi.

14th NLA mezüng phase temogo, March 26 nü tanabuba phase tenzüksü

Kohima, Metsüremi/March 12 (TYO): 14th Nagaland Legislative Assembly (NLA) indang ti buba Session mezüng phase anogo pongu mener Brehostibarnü tembangogo aser tanabuba phase atema House ya March 26 nü tanaben senteptü.

State Assembly puti otsü nung tang mezüngbuba session ka phase ana lemsar agir.

Tang session ya March 2 nü tenzükka Governor Ajay Kumar Bhalla-i jembia liasü.

Governor-i jembia nung 'motion of thanks' indang jembishinü dang Bharatiya Janata Party dak alaka party ajunga nungi züngsem temi Ministry of Home Affairs (MHA) ajanga Assembly nung session metenzük dang linük ken Vande Mataram atemtsü mesüra atentsü totuyuba agütsüba tebilemsü lemsatapa liasü. Totuyuba agütsüba ama mezüng anogo national anthem jakdang linük ken ya tema liasü.

Jembishinüba mapang House-i Vande Mataram atenba magizüki Khristanpur timba aliba state ka nung Hindu nunger süngyanglu tushiba ken matentsü ta jembia liasü. Züngsem temi Constitution of India indang Article 371A kübok Nagaland nung 'special constitutional provisions' agütsüba Assembly nung amshitsüla ta jembia liasü. Iba sülen Assembly-i MHA totuyuba asadangtsü asoshi Select Committee ka nem nungloksü.

Linük tesem balala nung Northeast nungi nüburtang anema mapa tamajung inyakba züngsem

temi aija liasü. House-i küm 123 tejen Dimapur Railway Station tajungba kuma yanglushitsü mapang tali agiba indanga jembia liasü aser "Critical Role of MSMEs in improving Nagaland's economy" nung ranglokera jembishinü aka.

Mezüng phase nung züngsem temi state tesem ajunga nung terenlok, ki o jen aser sorkar inyakyim dak sendakba asüngdangyaa liasü.

Kasa mapang Assembly nung sorkar indang bill ana agizük - Nagaland Goods and Services Tax (Amendment) Bill, 2026 aser Nagaland Lokayukta (Amendment) Bill, 2026 - bill anaprong Chief Minister Neiphiu Rio-i benoka liasü.

Anogo pongu senden nung Speaker Sharingain Longkumer-i anogo pezü ketdang asü aser anogo ka Deputy Speaker S. Toiho Yeptho-i ketdangyaa liasü.

Brehostibarnü mezüng phase tembangba sülen Speaker Longkumer-i iba session tanabuba phase ya March 26 nü tenzüksü ta sangdong.

Mezüng phase nung Chief Minister-i sangdongba ama, sorkari Frontier Nagaland Territorial Authority Agreement indang jembitsü amai lir, koba Centre, Government of Nagaland aser Eastern Nagaland People's Organisation (ENPO) tsüngta New Delhi nung February 5 nü zülutepa liasü.

Chief Minister Rio, shibai finance portfolio bena lir, pai phase tanabuba mapang 2026-27 atema Budget benoktsü.

NLA nung Assam-Nagaland arütsü tensa indang jembia

Kohima, Metsüremi/March 12 (TYO): Assam-Nagaland arütsülen Disputed Area Belt (DAB) nung tensa mejungi aliba indang tebilemsü Nagaland Legislative Assembly nung Brehostibarnü jembidang legislators temi security tebilemsü lemsatapa aser arütsülen alirtemi ali rakzükba aser administrative tsütsü timtem ajurur ta lemsatapa liasü.

Question Hour mapang NPF MLA Achumbemo Kikon-i iba ken o süokdang, Nagaland indang arütsülen aser talisa Ralan sector nung timtem aliba rateta ashi, koba pa indang constituency küboki aiter aser Assam den arütsü ya kilometers 105 shi lir.

Arütsülen state ana nung alirtem tsüngta mapang shia rarapangsenba aser tensa mejungi aliba indang pai House nung lemsatapa aser pa mapang timba item mepetmesü bentetba nung indoker ta ashi.

MLA Kikon-i state ana tsüngta 1972 interim agreement yanglua aliba onük süa aru, kong Nagaland-i disputed belt nungi police outposts tem agienogo. Ajsüaka arütsülen Assam police establishments timba ang akumer, ta ashi.

Iba dak sendakba nung, 1972 agreement meyangludang arütsülen Nagaland police outpost pongu liasü aser Assam 13 liasü, ta Deputy Chief Minister in-charge of Home & Border Affairs, Yanthungo Patton-i House dang metetdaksü.

Iba agreement zülen Nagaland-i outpost ponguprong agien, saka Assam-i par establishment magien

aser timba ang kumdaksü, ta pai ashi.

Tang DAB nung Assam-i permanent police outpost 63 amenoka lir, ta pai ashi.

Kikon-i ano mangatetep aliba tesemtem nung 'neutral forces' yoka aliba indang tebilemsü lemsatapa, parnokisa tensa kar nung 'neutrality' malir aser arütsülen nüburtang rongsenketzüng maparen inyakba nung timtem ajurur ta ashi.

Yangji aliba nüburtang ki o jen yangluba aser shishilempar maparen, talisa Naga entrepreneurs temi Ralan sector nung petrol pump amenokba nung tetsükdaksü agütsüba indang MLA Achumbemo-i ashi.

Pai ano census aser geo-tagging exercise dak sendakba nung timtem ajuruba indanga lemsatapa, aser Nagaland sorkari recognise süa aliba yimtsüng karbo geo-tagging mapang Assam nung aliba ama sayur, koba ajanga tarutsü nung administrative aser litsü-lika tsütsü tepenja adoktsü, ta ashi.

Kikon-i sorkar dang iba tebilemsü süoki ia agitsü ayongzük aser DAB region nung aliba Naga nunger tejangraba wazüka ayutsü atema arütsülen administrative tashi tali itsütsü ayongzük liasü.

Kikon dang langzüa arütsülen Tchunjanphen Police Out-post aser Lio-Longchum/Longayim Police Out-post indang House den lemsatapa dang, Tchunjanphen nung temporary outpost ka amenoka Indian Reserve Battalion (IRB) company ka yoka lir, ta Patton-i

metetdaksü.

Iba tesem nung permanent police outpost ka amenoktsü atema state sorkari asadanga mapang lir ta pai ashi.

Lio-Longchum/Longayim dak sendakba nung, tang iba tesem ya IRB nungi anogoshi armed patrols agi awabanger aser yangji permanent police outpost ka amenoktsü atema sorkari asadanga, ta ashi.

Patton-isa Wokha district kübok Ralan nung aliba DAB tesem nungi Nagaland aser Assam sorkar lungjemer illegal immigrants tem aridokba sülen yangji plantation drive kecha inyaka mali, ta House dang metetdaksü.

Iba dak sendakba nung Minister, Environment, Forest and Climate Change, C.L. John-i tang takong mapang asüba yong DAB area nung plantation mapa meinyakteter saka May aser July ita tsüngta inyaksü atema proposal agütsü lir, ta ashi.

Minister, Parliamentary Affairs K. G. Kenye-ia Assam-Nagaland arütsü tebilemsü küm aika mebenteti aruba indang lemsatapa liasü aser arütsülen aliba nüburtang nem tongtipang services agütsüsü lenmangtem maneni bushitsü, ta ashi.

Minister, Public Health Engineering Department, Jacob Zhimomi-i arütsülen terenlok maparen nung timtem ajuruba indang ashi aser Survey of India dang Nagaland indang litsü-lika shidak geographical mapping südaktsünung ajungtsü, ta shia liasü.

State nung domestic LPG stock peria lir

Dimapur, Metsüremi/March 12 (TYO): State nung LPG aser danga Petroleum osat aliba tensa asadangtsü atema Department of Food & Civil Supplies ajanga senden ka ayongzük liasü.

Kohima nung March 12, 2026 nü iba senden nung Kohima, Dimapur aser Chümoukedima nungi Deputy Commissioners tem, Department of F&CS aser Oil Marketing Companies (OMCs) nungi teshimtet lenirtem dena liasü.

Tang stock nung aliba

asadanga sülen Department of Food and Civil Supplies, Nagaland Kohima ajanga nüburtang ajunga dang market nung domestic LPG stock peria lir aser State nung anüng-pongba mali ta metetdaksü.

Iba dak sendakba nung Department-i consumers ajunga dang tsübo malitsü mesüra menüngdakba nung domestic LPG tali-tapong alitena mayutsü ayongzük.

Department-i Distributors, Retailers aser nisung ajunga dang

black marketing, sen tali meshitsü mesüra temelaba makai LPG ayoktsü ozüng agi memelar aser aibelener tem tapet ozüng agi merenshitsü ta ashi.

Domestic LPG ya digital booking system ajanga booking asür aser Delivery Authentication Code (DAC) ajanga agütsür. Booking ya anogo 25 sülen sütettsü. Tali-tapong alidenba mesüra tim masüba mapa meinyakdaksütsü mechi iba mera ya agir, ta Department-isa metetdaksü.

Koridang by-election tejangjaba akumer

Dimapur, Metsüremi/March 12 (TYO): Mokokchung district kübok 28 Koridang Assembly Constituency nung by-election agitsü atema tejangjaba akumer, kong political party aser nüburtang pei taginüba nübu shima candidates temai adoktar.

November 11, 2025 nü taoba MLA Imkong L Imchen asüba sülen iba assembly constituency nung by-election ya agitsüsa akumer. Electoral rules kübok menden tazüng nung ita trok tsüngta metdaksütsü shia lir. Brehostibarnü sangdong ka

ajanga ashiba agi, Mangmetong yimdag Yimlang Citizens' Forum-i tang aruya aliba by-election nung Imchatoba Imchen yaritsü sangdongogo.

Yimkong Salang nung lokti senden ka amemba mapang iba telemtetba ya agi, ta sangdong ajanga ashi.

Tang Imchatoba ya NPF Central Youth Wing nung tir ka ama inyaker, shiba taoba mapang Naga Students' Federation (NSF) tir inyaka liasü.

Kasa yimtsüng nungi iba by-election nung tokteptsü bilema

alisang, Imsumongba-i March 5 nü metokteptsü sangdong aser Imchatoba yaritsü telemtetba agi.

BJP Nagaland-i asür Imkong L Imchen'er jabaso Daochier I Imchen shimtsü ama angazük. Ajsüaka ano sangdong tejangja magütsü.

Kasa mapang NPCC tir S Supongmeren Jamir-ia party-i search committee ka tentetgo aser nüburtang shisa agütsüba nung ajemdaker telemtetba agitsü ta ashi.

28 Koridang AC nung vote agütsür nisung 22,390 lir.

Nalanda Development Dialogue nung Dr Chubaienla-i shilem agi



Dimapur, Metsüremi/March 12 (TYO): Assistant Professor aser HoD, Department of Economics, Jubilee Memorial College, Mokokchung Dr Chubaienla Imchen-i Nagaland tenung nung mezüngbuba Nalanda Development Dialogue nung shilem agiogo, koba March 8 aser 9 nü Nalanda University nung agia liasü.

"Foundations for the Future of Common Development Goals: Bridging Foresight, Building Pathways, Reviving Track-2 Diplomacy," omen nung ajemdaker agiba sensaksem sentong nung police yanglurtem aser India den Japan, Germany, Brazil, Nepal, China, Indonesia, aser United States ta linük tenet nungi development expert temi shilem agi, kong parnoki 2030 küm sülena terenlok maparen balala atema sensaksema liasü. Dr Imchen ya "North East

India Highlight-Conservation, Connectivity: Localization of SDGs as a Long-Term Development Strategy" session nung o jembir liasü.

Sentong nung o jembiba mapang Dr Imchen-i, Northeast India nung terenlok maparen ya GDP dak amekdaker inyakba maparen dang masütsüla saka terenlok inyakyim nung ecological sustainability, cultural integrity, aser inclusive livelihoods bendenloksüla ta ashi. Lai, Nagaland ya koda sobaliba nung takar aser lokti-i alirongsen achaayangba, yimsüsüba nung ajaki shilem agiba aser lokti riju balala communitisation dak amedaker aliba indang metetdaksü

Laisa, rongsenketzüng agi anüingba aser zünger aliba lanurtem mapa mangu aika aliba amala tongtibang tebilemsütem indang jembi aser organic agriculture, agroforestry, eco-

tourismand high- niche rural enterprises tem nung maangka aliba indang lemsatepba

Regional connectivity indang jembiba mapang lai, Nagaland ya Myanmar den international arrtsü nung lir asünung India indang Act East Policy aser Southeast Asian economic corridors küboki aiter, ta ashi.

Nalanda Development Dialogue kübok plenary roundtables, keynote session aser global development frameworks, macroeconomic challenges, aser regional cooperation onüktem nung ajemdaker bendanglen nungi shishashirtem aser policy yanglurtem densema sensaksem sentong balala agiogo.

Sentong nung shilem ka ama Nalanda World Heritage Site, Bodh Gaya semdang aser sobaliba aser rongsenketzüng senmang dak sendakba nung sensaksema liasü.

AI Implementation & Data Governance workshop agiogo

Dimapur, Metsüremi/March 12 (TYO): Nagaland Science Mission, Department of Science & Technology (DST) aser All India Management Association (AIMA) na longjemer state ketdangsurtem asoshi anogo ana atema "AI Implementation and Data Governance" workshop ka takok ngua ayongzüka agiogo.

Dr. Anuja Pandey, Program Director, AIMA-i session tenzüksü aser pai yimsüsüba tajung aser transparent public

service asoshi jenjang aketba data ji kanga tongtibang lir ta ashi.

Workshop nung sensaksem agiba mapang critical data gaps aser rezünga ayutsü atema tetsükdaksü ajangshiba nguteta liasü. Shisalen sayur den sensaksem mapang, Fire & Emergency Services, Treasuries & Accounts, Higher & Technical Education, aser Election department nungi ketdangsurtemi data flow streamline asütsü aser digital

infrastructure modernize asütsü nüngdakba lemsatep.

Kasa mapang nung Dr. (Prof) Sourabh Agarwal, Adjunct Faculty, AIMA-i, "data nungi insights-i" melenba indang rasa ashi aser tang state nung AI amshia takok anguba indang lemsatepba den Nagaland atema AI benoka inyaksü asoshi tasa ka agüja liasü.

Sentong nung anküp o Mission Coordinator, Nagaland Science Mission Er. Onongoto Soleho-i jembiba liasü.

Sentinaro Pongen-i Rising Star Award angu



Dimapur, Metsüremi/March 12 (TYO): Direct Selling Women Entrepreneurship Summit 2026 nung Nagaland nungi Sentinaro Pongen nem Rising Star Award agütsüogo.

Iba sentong ya Yashobhoomi Convention Centre, New Delhi nung agia liasü.

La ya Nagaland nungi tetsürtemrongnung iba national summit nung naroküm agizükba

mezüngbula kümogo. Iba sentong ya Confederation of All India Traders (CAIT) aser Association of Direct Selling Entities of India (ADSEI) nati ayongzüka agidar.

Sentong nung Union Ministers Pralhad Joshi aser Arjun Ram Meghwal na den Member of Parliament Praveen Khandelwal aser lenir balalai shilem agia liasü. Delhi Chief Minister Rekha Gupta-a iba summit nung shilem agitsü lir.

Maneni iba sentong nung India kübok tesem balala nungi entrepreneurs aser industry lenir meyirejang aikati shilem agiogo. Summit idang osang ya Aaj Tak, Amar Ujala, ABP News, Punjab Kesari, Dainik Tribune, Navodaya Times, aser Amar Sandesh nung densema national media outlet temi bona liasü.

MLA, Nuklutoshi-i MDSC indang ken o ashishi

Dimapur, Metsüremi/March 12 (TYO): 14th Nagaland Legislative Assembly Session tibuba nung March 12 nü pongunübuba senden amenba mapang MLA, Nuklutoshi-i, Dimapur nung Multi-Disciplinary Sports Complex (MDSC) atema senotsü agizükba aser kechiba iba Complex menoa meyangluzüker iba indang kuli metetnüa asüngdanga liasü.

Telangzüba agütsüba mapang Minister for Rural Development and SIRD, Metsubo Jamir-i House dang, tang tashi nung Multi-Disciplinary Sports Complex, Dimapur yanglutsü atema sen crore 140 agizükogo, ta metetdaksü. Paisa, 2006-2007 nungi 2010-2011 tsüngda Planning Commission nungi crore 43 agizük, ta ashi. Ajsüaka NITI Aayog-i melenba sülen senotsü kecha magizük aser kümtem tsüngda state sorkari crore 97 agütsü, anungji ajak senteper sen crore 140 entokogo ta paisa metetdaksü.

Sensaksem mapang MLA, Nuklutoshi-isa, Multi-Disciplinary Sports Complex, Dimapur meyangluzüki aliba aser sorkar sentong kechi ali iba indang Chief Minister, Dr. Neiphiu Rio dang asüngdanga liasü.

Ken o dak sendakba nung telangzüba agütsüba mapang Chief Minister, Dr. Neiphiu Rio-i, senotsü agi anüingba aser kümtem tsüngda senotsü shilem balala küma lemsar agütsüba

ajanga iba mapa tembanga minyakteti lir ta ashi. Paisa, tang tashi nung sen crore 140 agizükogo, saka iba mapang tembanga inyaksü atema sen crore 267 den GST aser tanga tintoktsü alibatem nüngdaker, ta ashi.

Rio-i ashiba agi, senotsü nung tetsükdaksü aliba apir sorkari Multi-Disciplinary Sports Complex ya tembanga yanglua takok tashi amshitsü atema Sports Authority of India (SAI) nem bendanga agütsütsü atema asandangdar.

Paisa, SAI nem iba facility bendanga agütsütsü asoshi tang tinyakdak lir ta ashi. CM-i, iba complex tanabenbuba asadangogo aser state sorkar aser SAI na tsüngda Memorandum of Understanding (MoU) ka nung sign asütsü dang anunga lir ta ashi. Department of Sports-i SAI regional directorate den iba tenangzüktepba nung sign asütsü.

Maneni Rio-i, iba stadium ya nisung 30,000 shi ametsü atema design süa yangluba lir aser lokti azüoktsü atema entry point asembose nüngdaksü ta ashi.

Pai ashiba agi, SAI nem bendanga agütsüba sülen parnoki stadium tembanga yangluba nung dang teyari agütsütsü masü, saka iba facility ya takok tashi amshitsü atema jenjang agitsü, kong coach tem yokba aser asaya balala atema national-standard training center tem amenoktsüba densema lir.

Trance Effect puri Def Leppard pur kentenba sentong lapoktsütsü



Dimapur, Metsüremi/March 12 (TYO): Nagaland nungi kentenba telok Trance Effect puri alima ajunga nung kanga nüngtugu rock band Def Leppard pur kentenba sentong lapoktsütsü renema lir.

Iba kentenba telok ya tang India nung yimti balala asema mapang ka lir aser parnok March 25 nü Shillong kübok RSDSA Sports Complex nung shilem agiba mapang Trance Effect puria shilem agitsü, koba Northeast India nungi independent band tem asoshi alizüng tongtibang ka tongtetba asütsü.


Iba kentenba telok ya tanem tanemi kanga nüngtugu küma odor. 2026 küm January ita Trance Effect pur Lollapalooza India nung shilem agi, kong nüngtugu kentenba telok Linkin Park, LANY, Calum Scott, The Midnight, aser Kehlani

nungeria shilem agia liasü. Taoba ita iba kentenba telok ya America nung rapper aser ken mejemer Raja Kumari dena sabang ka nung shilem agiogo.

Trance Effect pur ya India nung dang masü saka bendanglena kentenba sentong balala nung shilem agia arudar. Parnok Thailand nung kentenba benjung tulutiba Big Mountain Music Festival aser Vietnam nung kenten benjung tulutiba HOZO Tet Festival nunga shilem agiogo. Maneni parnok Singapore nunga shilem agiogo.

Trance Effect puri linük aser bendanglen Northeast India tenung ajungkettsüdar aser parnok maneni renlokyonga aoba mapang ka nung tang Def Leppard pur kentenba sentong lapoktsütsü maangka anguba ya parnok asoshi alizüng tasen ka tongtetba asütsü.

RN Ravi-i West Bengal Angh inyaktsü tenangzükba agiogo



March 12, 2026 nü Kolkata nung Kolkata High Court Chief Justice, Sujoy Paul-i ketdangsüa RN Ravi (abelen) nem West Bengal Angh tenangzükba agidaksü dang tangokba noksa nung angur.

Kolkata, Metsüremi/March 12 (Agencies): Brihostibarnü Kolkata nung R N Ravi-i West Bengal Angh inyaktsü atema tenangzükba agiogo; pa Bengal nung Angh 22buba asütsü.

Raj Bhavan nung Calcutta High Court nung Chief Justice, Sujoy Paul-i ketdangsüa Ravi nem Angh tenangzükba agidakja liasü.

Iba sentong nungji Chief Minister Mamata Banerjee, Assembly Speaker Biman Banerjee, minister tem, Kolkata Mayor Firhad Hakim aser Left Front chairman Biman Bose nungera liasü. Iba sentong nung Bharatiya Janata Party (BJP) nungibo lenir kata maden.

West Bengal nung Angh, C V Ananda Bose-i March 5 nü Angh menden nungi anisüngzükba sülen iba menden atema R N Ravi shim.

Tamalen Ravi-i Nagaland, Meghalaya aser Tamil Nadu

state tem nunga Angh inyaka liasü. R N ya Bihar yimtiba, Patna nung aso aser 1974 küm Masters in Physics renema liasü. 1976 küm pa Indian Police Service nung adenba sülen linük tesem balala nung tenzüka aruogo. Pa Central Bureau of Investigation (CBI) nunga inyaka liasü.

Pa Intelligence Bureau (IB) nung aliba mapang nung Jammu & Kashmir, North East aser Maoist telungpurtemi timtem agütsüba region aika nung inyakogo.

2012 küm sorkar mapa nungi anisüngzükba sülen pai osangkaket aika nung mapang shia ocet zülua liasü. 2014 küm Naga peace talk atema Centre sorkari pa Interlocutor shim.

2018 küm October ita nung pa Deputy National Security Advisor shima liasü.

Pa 2019 küm August ita

nungi 2021 küm September ita tashi Nagaland Angh inyak aser 2021 küm September ita nungi Tamil Nadu Angh inyaka aruba sülen tawa anen.

Taoba hopta C V Ananda Bose-i ajungbena West Bengal Angh menden nungi anenba sülen iba menden atema Tamil Nadu Angh, R N Ravi shima liasü.

West Bengal nung assembly election agitsü mapang ana nung lia C V Ananda Bose-i ajungbena Angh menden nungi anenba ajanga aika süngmanger.

Bose Angh menden nungi anenba dak sendakba nung Centre sorkar aija West Bengal Chief Minister Mamata-ibo, election agitsü mapang ana nung lia Union Home Minister Amit Shah-i Bose dang yimtenren dak sendakba nukjidong kar ataloktsü atema inyakang ta rongshi asütsüa akok, ta metetdakja liasü.

India-i tanga lenmang ajanga toztü 70% bener arur: Hardeep Puri

New Delhi, March 12 (Agencies): Tangbo India-i toztü shilem 70 bo 'Strait of Hormuz' ajanga masü saka tanga lenmang ajanga bener arur, ta Brihostibarnü Parliament nung Petroleum minister Hardeep Singh Puri-i metetdaksü.

India nung petrol aser diesel toztü peria dang angutsü aser anogo shia tanga lenmang ajanga Liquefied natural gas-a bener arudar, ta paisa metetdaksü.

LPG gas agi anünger ta aoksatepba ya supply agi anünger agi masü saka tsübutepba agi lir, ta Minister Hardeep-isa metetdaksü.

Iba dak alia LPG melen amshitsü atema state tem nem kerosene toztü kilolitre 40,000 tali lezmüksür, ta sorkarisa metetdaksü.

State sorkartem nem commercial LPG cylinders tali lezmüksütsü, ta ministry of petroleum & natural gas joint secretary, Sujata Sharma-i metetdaksü.

Laisa, linük nung aliba petrol pump lakh 1 nungi ka danga meshibang, ta metetdaksü.

Linük nung commercial LPG cylinders agi anünger nung ajemdaker Brihostibarnep Lok Sabha nung Opposition lenir, Rahul Gandhi-i Narendra Modi aija liasü.

Rahul Gandhi-i, Modi-i United States nung Epstein files ken o aser Adani dak sendakba ken o atema shisabulur, ta metetdaksü.

"Ato kilonseri aoksatsü nungdak mali, ta ashir saka Ato kilonserbo tanga kulitem ajanga tsübur. Epstein files atema pa tsübur, Adani ken o atema pa tsübur aser ibaji ajanga pa senden nung adentsü atema-a maruteter," ta Gandhi-i aija liasü.

Brihostibarnü Parliament nung budget senden tagidak mapang nung opposition MP tem aikati LPG cylinders agi anünger anema Parliament House complex nung longkak aita sorkar dang telangzüba agüjang, ta takhangba agüja liasü.

Brihostibarnüa linük tesem balala nung petrol pumps aser LPG distribution centres nung nisung aika tarensena nokdaktepa liasü. LPG agi anünger agi linük tesem aika nung restaurants aser hotels shibangogo.

Hombar nungi tenzüka talisa Maharashtra, Delhi, Uttar Pradesh, Bihar, Karnataka, Tamil Nadu aser West Bengal state tem nung LPG cylinders agi anünger.

Oil marketing companies aser state sorkartemi nüburtem dang, petrol aser diesel toztü peria dang lir, ta shiaka commercial gas agi anünger agi nüburtem kanga tsübuteper.

Gulf linüktem amakba atema Iran aitsüba bangzüng ka India-i pusem

New Delhi, March 12 (Agencies): Iran-i Gulf nung aliba linüktem amakba anema United Nations Security Council (UNSC)-i renema bangzüng ka India densema linük 135-i pusem.

Züngsem 15 aliba council indang Resolution 2817 (2026) ji linük aikati pusem saka China o Russia natibo vote agütsüba nung shilem magi.

Iran-i Bahrain, Kuwait,

Oman, Qatar, Saudi Arabia, United Arab Emirates aser Jordan linüktem amakba atema Iran aija iba bangzüng renema liasü.

Iba bangzüng ajangasa Iran-i nisung aliba tesemtem amakba aitsüba den külemi tangsa Gulf nung aliba linüktem amakba anentsü atema takhangba agütsü.

Iba bangzüng ajanga Iran dang tzüyim nung shishilembaba

tsütsü amokmerenba, tenokdangba benokba aser tim masüba mapatem inyakba anentsü akhanger.

UN nung Iran ketdangseribo iba bangzüngji aija, iba ya ozü linük anema tim masüba nung inyaksangshiba lir, ta aitsüogo. UN nung Bahrain ketdangseri iba bangzüng pelaa agizüka, "Iba osang ya tejangja, aser alima linüktemi Iran-i tim masüba nung inyaksangshibaji

magizüker," ta metetdaksü.

Iba bangzüng renema agizüka pusema Israel-i, "Civilian amakbaji tai, yimtem amakbaji tai. Iran-i anentsüla," ta metetdaksü.

China-i, "Iba bangzüng ajanga rara adokba atangji terabo mesayur," ta metetdaksü.

Iba bangzüng benoka vote agütsütepba sülen UNSC-isa Russia-i benokba draft bangzüng ka magizüker. Iba bangzüngji pusema vote pezü dang agütsü.

March 12, 2026 nü Parliament nung budget senden tagidak mapang Lok Sabha nung opposition lenir Rahul Gandhi, opposition MP tem- Hibi Eden, Prashant Padole, Manickam Tagore aser tangartemi LPG cylinder agi anünger anema Parliament kima longkak aitba noksa nung angur.



Form No. 3
[Regulation-13 (1)(a) repringang]
DEBTS RECOVERY TRIBUNAL GUWAHATI
 Suwarna Bhawan, House No. 12, New Town Path, Near Hanuman Mandir, G. S. Road, Ulubari, Guwahati- 781007 (Assam)

Case No.: OA/667/2025
 Iba Act nung section 19 kükob sub-section (4) aser Debt Recovery Tribunal (Procedure) Rules, 1993 nung aliba rule 5 kükob sub-rule (2A) nung ajemdaker jaoker.
 Exh. No.: 5870

PUNJAB NATIONAL BANK
-Vs-
M/s Star Furnishing House, & Ors.

To,
 (1) **M/s Star Furnishing House,** A Proprietorship firm represented by its proprietor Md. Younus Mansuri, S/o Newaji Mansuri Chand Kewri, Nyamo Lotha Road, Dimapur, Nagaland-797112.
 (2) **Md. Younus Mansuri** S/o Newaji Mansuri Chand Kewri, Prop- M/s Star Furnishing House Nyamo Lothal Road, Dimapur, Nagaland- 797112.
 (3) **Md. Elius Mansuri** Prop - M/s Heena Cotton Industries S/o Yunus Mansury Golaghat Road, Dimapur-797112.

JAOKER
 19.02.2026 anogo nung Presiding Officer/Registrar matsüngdang OA/667/2025 benoka liasü.
 Iba Act nung section 19(4) kükob shia aliba application nung ajemdaker iba Tribunal-i na anema benoka aliba (OA) nung ajemdaker sentsüth **Rs. 4544545.82/-** alangzüksü atema na jaoka/notice agütsür (application den documents etc. densema lir).
 Iba Act nung section 19 kükob sub-section (4) nung ajemdaker, na, defendants dang tekükoben alibatem tuyur :-
 (i) tajaba agütsüba sülen anogo semer nü tsüngda relief asoshi mepishibaji kechiba magütsütsü, iba kuliji sayutsü metetdaksü;
 (ii) Original application nung serial number 3A kükob applicant-i shia aliba kiojen aser assets dak alia tanga kiojen aser assets sangdongtsüla;
 (iii) Original application nung serial number 3A kükob shia aliba kiojen aser assets ayoktsü mesüra item kiojen atema inyaksangshitsü memelar;
 (iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;
 (v) Ordinary business ajanga secured assets mesüra tanga assets aser kiojen nungi yokzükba senji security interest soita aliba bank mesüra financial institutions indang account nung deposit asütsüla.
 Nü dang tezüluba nung sangdong applicant nem agütsütsü tuyur aser **02/04/2026** anogo nung anepdang **10:30** ako nung Registrar matsüngdangi arutsü tuyur, yamaji meinyakra application ji angadangtsü aser na meliaka telemetba agitsü.
20/02/2026 anogo nung tsünglanglen kü meyongnem den iba Tribunal indang seal agütsü:
Registrar,
Debts Recovery Tribunal,
Guwahati



TIR YIMYIM YIMOBILEM (EDITRIAL)

DIMAPUR FRISDAY, FEBRUARY (METSUREMI) 13, 2026

Asenoka lenir lir !

Coffee ya asenok asoshi tajemtsü tasen ka masü aser coffee lu ayimba maparena asenok asoshi meinyakdangba mapa kabo masütsü, saka Mokokchung Coffee ta asüba yabo asenok asoshi osang tasen ka lir aser coffee jemdanger mongintemi Mokokchung coffee ya alima nung terunem tajung aketba coffee tajungtem rongnung ka ta jemtetbaji asenok ajak asoshi osang tajung ka asütsü. Iba nungji asenok lenir akümer. Atangji, taoba alima aso 20 buba nunga asen lima nung nisung aikati coffee lu ayimba osang angashiogo, ajisüaka item lu nung jagi Coffee tangzüka ayokba osangbo mangashi. Ashiko, taoba putu nung lenirtemia yamaji dang inyaka sayuji, iba mapang coffee lu ayimbaji coffee agi sen akümtsü asoshi ayim masü saka Coffee lu mayim ser coffee lu ayimba tenung nung angati sen agizüka agitsü asoshi taila coffee lu ayimba mapa ka asütsü akok. Iba jagi asenok ishikabo senotsü terabo ajangzüker asütsü saka government teyari ajanga coffee lu yima pei mapa yari takar kuma alitsüba lenmangbo peisasa shibangadok. Ajisüaka, tepelatsü kaji, tanü lanur putu nung tazüng-tashirtem aluyimer kümer, alu nungji züsentetba ajanga tangari asenok metettsüsa inyaktetbaji temelenshiba putu nung temelenshi tajung ka asenoki ataloka angur asütsü. Yashi tashibo asenok class ter tashi danga zügra alu mayimtsüla ta angatet, anungji graduate aser post graduate asür rogotem asoshibo alu ayimtsübaji taaktsü mapa ka amato aküm. Asenok kaketreju nung kaketshisatsü tai ka agütsübaji ibaji liasü, kechiyong kaketshisatsü angazükbaji alu mapa inyaktsü asoshi azünger masü saka government mapa inyaktsü azünger ta angatetdaksü. Ibayongji, tanü government mapa inyaktertem ita sen ajunga tangar dang nungji chiyongtsü aliba nung endoker. Tangarbo chiyongtsü tama peria senzüteta yur 'politics' jembir, saka asenokbo 'politics' lu ayimer, iba jagi asenoki asayaba politics-a tamagitsü akümer aser asenoksasa asenok tebok sünga meliteter. Ibayongji, tanishir asütsü melen tanidaker asütsüa metemsü akümer. Tanü item tamashi aser tamakok tensa tia ajak tajungba kuma melenshitsu tazüng temeteteritemi alu ayimba, shiruru metsüba aser nübor nungdaktem reprangteta kechisarina yanglua ayokba mapa yagi asenok rongnung ano maneni lenir adokdagi ta pelaa bilemer. Aji oda, Mangmetong nung lushi nung Er.Philip-i Coffee lu takok ngua ayimba osangji lanurtem asoshi anidaka aotsüba lenisüba lenmang tajung ka pai lapoktsür asütsü. Tanü putu nungbo asenok asoshi pa amajiang lenir lir. Iba amaji tazüng tashirtemi nübortem dang inyaka sayutsüla, ibaji mapa agi inyaka sayuba lenisüba, Leadership in Action, mapa ka asütsü. Iba amaji Mokokchung district nung tesem aika nung tazüngtemeteteritemi Coffee dang masü, süngo lu yima süngo menünga, rubber lu yima rubber ayimba, süngjanglijang lu, kozü lu aser aghar lu ayimba, ak, an aser angotsüba mapatem nung temulung agüja inyakba agi nübortem nem lenisüba mapa tajung agütsüba angur. Item jagi mapa mebushir saka mapa agütsür. Alima asoshi tagitsüji aji lir. Joko, tanü putu yabo taoba pututem ama masü, aluyimba aser teka mapa ajak tazüng-temeteteritemi inyaktsüba dang lir. Iba jagiang alu tajungba yimteter. Akhidangbo, nisung ajak aluyimer, tanga mapa kecha maka, anungji anogo shia nisung ajakji alui aoer saka tebok masünger, ibaji tazüng temetetba kecha mali ser inyakba ajanga liasü. Atangji, akhi mapangbo alu nung züsentetba aonsutsütem agi sen akümtsüsa tayokdak mali asü, anungji asenok sobaliba nung aonsutsü ayokba aser aliba mali asü. Tanübo, alu nung dang masü saka arem nung pasasa adokba süngolemba aser süngjanglijang dena sen akümtsüsa tayokdak lir. Itemji reprangteta kodang tazüng-temeteter lanurtemi aluyimba nung temulung agütsüdir, idangjiang ano asenok rongnung lenir aika adoktsü. Lenir ta asübaji yimten yimsüsür akümbaji dang masü mesüra government mapa tuluka angubaji dang masü mesüra lokti nung ketdangpur asüba kisüngjia masü, saka shirnoki pei tashitemetet, shisatsü aser mapa agi nübortem nungdak peritsüsa inyaka sayur aser nübortem aotsüba rongsen aser tepela lenmang lapoktsür, pa mesüra laji asenok lenir lir.

OLEMSABANG

TANÜ PUTU NUNGLANUR KATAKÜM SENTI MAPANG DEN PA/LA TAKÜM RAKSABA

~ Bendangnaro Jamir

Lanur ka taküm nung memeteti mapang sashia odaktsüba iba timtem ya kanga bulua adoker. Lanur ka taküm angati nung senti mapang ajak phone, game Yamala nung memeti arishi mapang intoker iba timtem ya kanga tesashi aser tashidak tulu lir. Tanur asüdang nungji tenzucker pa/la tepenjem mapang ajak ya nungdak masüba ka nung mapang intokba tesasatsü kaji phone memetetdang nungji amshidaktsüba ya lir. Iba timtem ya tanur dak nungji tenzucker asen tsürabur tai ajanga tenzucker. Meimchir ka takümüji mapa ajak nung inyakdanga tajung, majung metetsu mapang mali saka tangar kechi tai inyakba ajanga iba mapa azünga, libaliru, inyaksangshi nungji tamokok angur iba nungjaki asenoki angzüker asenoki kechi tajung melenshia inyaktsula aji metetsü kanga nungdaker tesayur kati ashiba agi meimchir arishi ya kanga tatsü asenoki alima nung aliba ajak inyakdanga alitsubaji aji meimchir ka atema tamakoktsü. Anungi tangar kechi nung aiblenba ajanga pa/laji tatidang, taküm yimya mesura tazünga yimya aseni iba saku ji aibelen meinyaktsu indang ashir ta aseni angateter.

Anungji tsürabur ka tai agutsubaji tanur asudang kum ka majung dang nungji mobile phone nung aruba noksa, videos, yamalaji, sayua aser tanurji, 0-16 tashi nung pa/la angazuktsüba Shisatsuji kanga sashia alir. Iba mapang nung tamajung, tajung angazükbaji pa/la akumli atema asur. Anungji kum ka majungdang nungji tanur mesüzuktsüba atema phone amshia sayuba dang masu saka kodang apuzüa mesura asayatsüba mapang nung asenoki tanur nem phone amshidaktsur, asenok mapa inyakdang asen mapa nung tetsukdatsü malui aser parnok a ajem ajema meyiuri parnok tesem nung marakzui lidaktsutsu atema agutsur saka iba timtemji ajak rongnung tesashi aser tulutiba lir. Phone nung internet inoktsur alima nung inyakba aser atalokba metetba dang masu saka asenoki memetetba aser machitsula item ajak noksa nungji arur. Tanur chi chiyongdang tanur tila spoon a bener mechiyongtetdang phonebo tsukloker atateter item titem kibong aika nung ajangshir. Item tanurtem kodang tain kumdir parnok nungji angazuktsu kecha mali akumer. Asenok tsurabur phone maliba mapang nung aliba ajanga asenoki otsula obula otsu ishikabo meteta lir saka asenok nungji tenzucker aoba nungji asenoki ashitsu kecha malir. Kechiyong asenokia chi mechiyong kunu ananubo liteter saka phone malibo anogo ka aotsuji kum ka amai bilemer. Tanu asung tanur aika sentepi aor mali. Aser iska aruba nungji lanur aser tanur karbo phone amshia dang kazur. Tanu lanur aika phone amshiba ajanga ki mapa aika meinyaktet tamakok aludaktsur. Tsurabur tepang kanga shidaktsur aji dang masu tanu putu nung lanurtem aremzukba shisatsu mali akumer. Tanu lanur aika pei takdang nung shibanger anogo peyong phone amshiba ajanga asen nubur asoshi tamakoktsu jenti ajurur. Phone nung social media balala aika lir tatishitsu agi facebook, Instagram, YouTube ano aika yamalaji lapoka yur asenok senti mapang ao mesasai anogo peyong amshiteper. Phone ya nungdak atema adokba aser iba mapa ya kanga tajung karbo rongsen aguba angur aser medemer aika yimtetba dang masu saka alima asenoki maguba aser memetetba ajak meteter saka phone tetezu junga memetet sur tanur nem agutsu nungbo asenok tarutsu putu asoshi rongsen, khonang tarutsu nukla samaba dang asutsu.

Tanu lanur aika phone amshiba ajanga pei arishi kum aoba memeteti suidaktsur. Asenok mapang ka nung mapa aika inyaktsüsa adoker kum terti(18) nungji tenzucker kum semer pungu mesura trok, tenet tashi nung zungtemtsula, kibong azkumtsula asenok tashi kaa alidang, tsurabur, adianu yaritsula yamaji maparen aika adoker kechiyong akhi mapang ama arishir nisung mali akumer. Dang asenok putu nungji tenzucker kum 109 tashi alibatem ya joko tatembanglen amai lir kechiyong laishiba nung meyi tema alirtem arishir asenok otsula obula nungeri dang metet saka otsula obula nungji tenzucker noklang tema alirtem ishikadang lir. Tanu putu nung asortem ya roker (60) tema danga asunung arishir ta jembir. Anungji asenoki mapang arishitsu kangasa tongtibang mapang ka lir.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Israel-i amakba ajanga Lebanon nung Khristan tem takoksa angur



Israel-i Lebanon arrtsülen aliba Rmeish jila nung bomb pokloksüba sülen mozükü adokba noksa nung angur.

March 12, 2026: Israel-i anünglen nungi amakba ajanga south Lebanon nung aliba Khristan yimtsüing aika kongshiogo; item tesem nungi Khristan aika jenshiogo aser aikati lendong ajuruaka toktsür maotsü telemteba agir.

Israel-i anünglen nungi amakba ajanga Lebanon nung ketdangsertemi yimtsüingtem toktsür aienshitsu ajungshir; Hezbollah telok amenoka maliba yimtsüingtem nunga nüburttem dang yim toktsür aienshiang ta tuyur.

2023-24 küm raraba mapang nungbo Lebanon south tsütsülen aliba Khristan timtem majangshii liasü. Ajsüüaka tang rara nungbo Israel-i anünglen nungi amakba mapang nung Khristan yimtsüingtema kongshir.

Israel-i anünglen nungi amakdang Khristan nütsüing teimba aliba jila 'Alma al-Shaab'-a kongshiogo. Iba tatalokba nungji jila nung alir Khristan Sami Youssef al-Ghafri süogo.

Israel-i tekümdangtsü metetdaksüba süeln UNIFIL teyaritep ajanga aikati item tesem toktsür jenshiogo, saka ano aikati toktsür aotsü memelunger.

Marjeyoun district kübok Khristan nütsüing teimba aliba Qulay'a jilaa bomb ajanga kongshiogo. Iba tatalokba nung Khristan putir Pierre al-Rai asü.

Putir Pierre-i iba rara anema ola adoka liasü aser tensa komaka mejungaka pai iba jila toktsür maotsü, ta metetdakja liasü.

Hezbollah telok den raratsü atema Israel-i Litani ayongküm nungi south tsütsülen alirtem dang pei aliba tesem toktsür aienshiang, ta tekümdangtsü metetdaksüba süeln arrtsülen aliba yimtsüingtem nung alirtem, talisa Khristanemi Lebanon sorkar aser sepaitem dang security agüjang ta mepishir.

Taoba Amongnü Rmeish jila nung aliba Arogo nung putir, Najib al-Ameel-i, "Onoki iba jila toktsür maotsü telemteba agiogo, kechiyong iba li den

onok sendaktepa lir aser onoki iba jila meimer. Rmeish jila nung aliba sensotem ama timtem tensa mapang ajak nung onok longjema dang lir. Mejangjaba tesem nung mezüingmeshia tepsetdaksütsü melenbo onok yangi dang süadoktsü," ta metetdakja liasü.

Lebanon arrtsülen aliba yimtsüingtem Lebanon sepaitem dang security meshir, aser ibaji talisa ozüing alema inyakertem aser Hezbollah telok mamenokdaksütsü atema lir.

March 9 nü Lebanese Kataeb Party, MP Sami Gemayel-i, "Tesüüba anogo pezünü tsüingda ni army commander General Rudolf

Heikal den asembe jembioogo aser pa dang Qulay'a, Marjeyoun, Rmeish, Debel aser Ain Ebel jilatem nung sepaitem lemezükjang ta tuyuogo," ta metetdakja liasü.

Paisa, Hezbollah züingsemtem ki ka nung jenok, aser ibaji ajanga Israel nungertemi iba tesemji amakdang Khristan putir Pierre al-Rai asü, ta metetdaksü.

Lebanon Foreign Minister, Youssef Raji-ia Vatican Secretary of State, Monsignor Paul Gallagher dang arrtsülen aliba yimtsüingtem nung aliba Khristanem kümzüksü atema Vatican nem tiyongtsüü aita inyakdaksüner, ta mepishio.

Madhya Pradesh nung Kotwara yimdak pastor ka dak azük

March 12, 2026: Madhya Pradesh nung Hindu nungter telok kati house church ka amakba mapang nung tetsür-tanurtem dak-a azük aser pastor dak kanga mejungi azük.

Tawa Madhya Pradesh nung Khandwa District kübok Kotwara yimdak tekülem sentong agitsü atema arrshi küm 42 pastor, Ramesh Barela, Naval Singh'er kidangi oa liasü.

Singh'er kidang kibong pezü (Khristan 16) adenshi aser aonung 9:00 ako nung tekülem sentong tenzükba sülen mapang tatsüka tsüingda Hindu yimsü alia amanger nisung 100 shi arua timtem agütsü.

Osangbener den jembidang pastor Barela-i, "Ni Naval'er kidangi aoba mapang yimtsüing ka süüa aodang Hindu right-wing züingsem kari ni angu. Tanü-asüingbo parnok network kanga tulu kümogo. Parnoki mita atar aser WhatsApp groups nung osangtsüsang kerakera proker," ta metetdaksü.

Lokti jagi Singh'er kiji longbangba sülen kishi kakpoker atu, ta pai ashi.

"Iba sülen parnok kü dak azük tenzük. Ni parnok dang, mangatettep bentettsü atema teka mesangshitsüla, saka o

ajakdang angatetteptsüla ta ashi. Ajsüüaka parnok maneni kü dak azük," ta Pastor Barela-i metetdaksü.

Parnoki Pastor Barela kimai atsüzüksü merang saka Arogo nung züingsemtem pa atsüüta ayu. Ibayongji parnok tetsür-tanurtem dak-a azük tenzük.

Iba tatalokba nung Singh'er semchir anata yirua liasü. Parnoki Khristanem dak azükba dang masü saka ki-a bendoktsü.

"Parnoki onok nem tai tongloksütsü aser kuli amshitsü nükjidong nung Laishiba-a bushia liasü, saka parnok Laishiba ka danga mangu," ta pastor-i ashi.

Pastor Barela-i pa meyong smartphone nung 'Bible app' dang amshir. Pa dak azükba mapang nung pa meyong phone-a sama.

Item tatalokba ajakji Khristan kati phone ajanga tangoka liasü, ajsüüaka iba mapang nungji Hindu nungter kari kidang light tesangwa ajak shibang.

Khristan kati phone ajanga iba osangji police nem metetdaksüba sülen police arua Pastor Barela aser Singh na Khandwa district hospital-i anir ao.

ANO GO ABEN TSÜNGREM DEN

Taküm nungdak anguba
(T.ken 118:10-18)

"Kibuba kü tashi aser kü ken lir, Pa kü tekümtet küma lir" (t.14). Ibai Anitet 15:2 aser Isaia 12:2 nunga lir. Israel nungter ljiip nungi adoker Tenangzükba Limai aodang, parnok parnok tsükchirtem tzüym nung samaba ngur iba ken aten. Isaia 12 ji kodang Tsüngremi parnok kümzükter Pa yimli yangludir, idangji Israeli iba ken tarutsü nung atentsü ta Tsüngremi nangzük. Tanüa asenoki iba ken tetezü nung pelateptsü akok.

Tsüngrem asenok tashi lir. Iba jagi asen taküm nungdaktem anepalutsür. Tashi angutsü nai kong bushir? Nai metetba? Na anema aliba? Ne sen? Item ajak ya samatsü. Kibuba tashii dang taküm nungdak agütsütsü akok. "Shirnoki Kibuba dang ataa alir parnok tashi tasen angutsü" (Isa.40:31).

Pa asenok ken lir. Iba jagi taküm nung saksalemdaksür. Aika taküm nung jangramatem mapang ajanga aor. Nai aginüba ama mesüi süidaksür. Tangari anguba maongka mapang tajung mangur aser meinyakteter. Kibubai ne nem tepela agütsütsü.

Pa asen tekümtet lir. Iba jagi asenok taküm lendong nungi kümzükter. Pai asenok kümzükter aser teti asen tsütsü lir. "Kibuba teka achichi ajungketa lir: Kibuba teka tachichi agi takok inyaker" (t.16). Iba teka tanüa asenok den lir.

Tamangertemi iba ken atentsü akok, kechiaser Tsüngremi asen nungdak ajak anepalutsür aser taküm lendong nungi kümzükter. Taküm timtem ajak nungi Tsüngremi na kümzükter ta bilemtetang.

Pastor Barela-i, "Ni shia meyipdaksütsü merang, ta tai aruba mapang nung ang ni tongloksü.

hospital nung alibaji ni meteta liasü. Ni iba hospital nung anogo pezünü amongba sülen ano private hospital kati oa anogo ananü among. Iba tatalokba sülen police-i ken o ana benok. Ki kibur Singh-i nisung asem anema ken o benok aser Vijay Kumar Rathore-i Pastor Barela densema Khristan asem anema ken o benok.

Singh-i, "Ozü kidang sarasadema aliba mapang nung nisung asem leniba nung lokti ka aruba sülen ozü ki kakpok, aser onok dak azük," ta metetdaksü.

Pastor Singh'er medemer Pastor Sunil Arya-i, "Singh-i aibelenertem aika maitsü jangjateta liasü. Naval Singh-i police nem aibelenertem tenüing aika agütsü saka police-i nisung asem tenüing dang FIR nung zülüok. Tangartemjibo 'lokti' ta dang züingshir," ta ashi.

Ano külen Rathore-i benokba FIR nungji Singh, Dashrath Vishwakarma aser Pastor Barela nungter tenüing tetshia lir.

Rathore-i police dang, par asem jagi Hindu nungertem Khristan yimsü dangi

Madhya Pradesh Freedom of Religion Act, 2021 kübok pastor den Khristan ana anema ken o benokogo.

Pastor Arya-i, tang tashi nungbo iba ken o nung shinga pua mali, ajsüüaka Khristanem anema benokba ken oji tamajungba, anungji akokba tashi tekeraba nung Khristanemi anticipatory bail meshitsüla, ta metetdaksü.

Pastor Barela tang tashi kidangi meshilang. Pa atema Jabalpur nung aliba High Court nung bail temepishiba agüja alir. Pastor Barela'er jala pezü lir aser pai par adianu asür ka jala'a pai repranger. Pastor Barela'er jala pongu rongnungi asembo kiyii ogo aser anabo tang high school tezüingdak, anungji pa jail nung puokra jala ana terepranger malitsü.

Pastor Barela-i, "Yimlibilema ni asoshi sarasademjang. Ni anema tiyazü nung ken o benokba ajanga ozü kibongi timtem tulu ajangshir," ta ashi.

Tang alima nung Khristanem alitsü atema linük tamajungtiba 50 rongnung India ya jenjang 12buba nung lir (Open Doors' 2026 World Watch List).

AO OSHI ANGAZÜKDAK:

TANÜ ANGAZÜKTSÜBA OJANG



Wailok

(v) paitepa enok, amsem (twine)

* Tongti tesemdang tapubang nung sü talila ka wailok.

Wain

(n) ajak nung tain, takotet (veteran)

* Yimten nung wain nisung nungdaker.

OLONG PAITEP # 7442

Grid for OLONG PAITEP # 7442 with numbers 1-16 in various cells.

TIPLIN

- 1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjildong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7441 TELANGZÜBA

TIPLIN :


- 1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER

Table of ICC T20I World Cup winners from 2007 to 2022, listing year, winner, and flag.



Tang tashi nung ICC T20I World Cup koker aliba team tem.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Assam: STF-i Barpeta nung jihadis ana apu

Guwahati, Metsüremi/ March 12 (Agencies): Fundamentalist teloktem den sendaktepa aliba nisung ana Assam kübok Barpeta district nung Bodhbarnü puogo, ta ketdantsürtemi metetdaksü. Sorbhog police station kübo tesem ka Special Task Force (STF) puri aonung menor meita aoba mapang nisung ana ya apu.

Assam Police headquarters nungi ketdangsürtemi ashiba agi, itangitertem nungi osang tejangja angazükba sülen temulung melemi blemertem ya Mongolbar aonung pua liasü. "Jihadis asütsü ta temulung melemi bilemer ana ya Barpeta nung puogo. Tena dang tang ken o asüngdangdar aser tatsüka lir osang tejangja agütsütsü," ta police ketdangsür tejen kati ashi.

Police source temi ashiba agi, pua alisang ana ket nung ya Pakistan indang SIM card tem ngutetogo, koba bushisüngdang nung shilem ka ama asadangdar. Nisung ana rongnung ya ka Sahidul Islam ta jangjaogo. Ken o ashishitsü atema tenaprongla Guwahati-i anirogo.

Barpeta district ketdangsür kati ashiba agi, local police den sendaktepa iba meita aoba sentong benoka inyaka liasü.

Assam nung extremist tem inyaksangshiba putetba sülen tang nisung ana ya puogo.

Taküm January ita extremist telok Imam Mahmuder Kafila (IMK) züngsem 11 apu aser iba ajanga iba telok ya arrtsü adener Bangladesh aser West Bengal tsüngda inyaksangshiba ngutetogo. Iba telok ya Bangladesh nung amendaker

aliba Jamaat-ul-Mujahideen Bangladesh (JMB) nungi jakzükba telok ka ta amanger.

Bushisüngdangtemi ashiba agi, iba telok yagi osang balala belentsü, parnok sentongtem prokshitsü aser lanurtem anioktsü atema encrypted social media sabang balala amshia liasü. Parnoki "Purba Akash" ta agütsür Telegram telok ka züngsem tasen anioktsü atema Barpeta aser Chirang district nung nung amshia liasü.

Bushisüngdang ajanga Assam nungi iba telok nung züngoksemer kar training atema Bangladesh-i ogo, aser kasa mapang nung local lanurtem atsüa arutsü aser extremist ideologies tem pusemdaksütsü atema iba telok yagi miima sendentem ayongzüka mena liasü.

Thowai Kuki yimtsüng nung Kuki nunger ana sür lia ngutetogo

Imphal, Metsüremi/March 12 (Agencies): Manipur nung Ukhrul district kübok Thowai Kuki yimtsüng nung khatepba sülen samar bushia aliba Kuki nunger ana Brehostibarnü sür lia ngutetogo.

Manipur Chief Minister Yumnam Khemchand Singh-i state assembly dang ashiba agi, iba dak sendakba nung state police-i ken o ka benokogo.

Chief Minister-i House dang ashiba agi, iba ken o ya kanga junga bushisüngdangtsü aser ochibaji kechi aji shitak kaktetsü atema National Investigation Agency nem bendanga agütsütsü.

CM-i, ken o tatongi rasa

mashi aser asürtem tenüng memetetdaksü, saka sorkar inyakyim dak ajemdaker asür kinungertem nem senotsü teyari agütsütsü ta sangdonga liasü.

Leader of the Opposition Keisham Meghachandra (Congress MLA)-i Kuki nunger samar aliba aser kin balala nungi telok ana tsüngda khatepba mapang yiruba Kuki nunger ka indang ken o asüngdangba mapang Manipur Home Minister Govindas Konthoujam-i ashiba agi, Thowai Kuki yimtsüng nung alir Kuki nunger Lalmithang Haokip (41) injang agi tetsüng yirua liasü. Pa Community Health Centre, Kangpokpi nung temang

anepalua liasü, ta metetdaksü.

Thowai Kuki yimtsüng nung prangbong hadir balala bener arua poppy tsünüa aliba raksaja rongtoktsüba sülen telok ana tsüngda khatepba liasü, ta Home Minister-i ashi.

Paisa, Bodhbarnü Ukhrul district kübok Shangkai yimtsüng nungi telungpur telok kati Naga nunger passenger 21 pur aoba chiokogo, ta metetdaksü.

Pai nüburtem aser talisa mangatetep adoker aliba teloktem dang azütokshi nungi pilatsü aser yimjung nung külemi alitsü atema meranga inyaksü mepeshia metetdaksüogo.

East Garo Hills nung curfew ghonda pongu atema salatsü



Shillong, Metsüremi/ March 12 (Agencies): Meghalaya nung ketdangsürtemi East Garo Hills district nung curfew benoka aliba Brehostibarnü tera salaja iba tesem nung alirtem anepdang 8 nungi 1 ako tashi nung shishilembatsü asoshi temelaba agütsüogo, ta ketdangsürtemi metetdaksü.

Kidanger West Garo Hills district nung anogo ana tejakdang azütokshi lendong atalokba sülen mepetmesü maneni adokyonga aotsü akok ta bilema BNSS Section 163 kübok curfew ya benokogo.

East Garo Hills Deputy Commissioner, R P Marak-i ashiba agi, nüburtem parnok

tenüngdakba osettsütem alitsü atema temelaba agütsütsü asoshi talenba salatsü ,aser kasa mapang nung security personnel temi lendong ataloktsü ana nung aliba tesemtem maneni meita atadar.

Taruba Garo Hills Autonomous District Council (GHADC) elections dak sendakba nung longkaka aitba mapang West Garo Hills nung iba mepetmesü adok. Garo nunger masürtemi election atema nomination file asüba nungi mepetmesü ya tenzuka liasü.

Ketdangsürtemi ashiba agi, Mongolbarnü Chibinang tesem nung mepetmesü adokba sülen police-i lokti senshidaksütsü

atema injang khalokja liasü. Iba mapang nisung ana asü aser aika yirua liasü.

Maneni Garo Hills nung ki o jen-a aika raksaogo aser iba ajanga ketdangsürtemi security force talila yoktsüsa aküm. Army column pongu iba tesemi yokogo.

Iba mepetmesü dak sendakba nung Chief Minister Conrad K. Sangma-i Bodhbarnü sangdong ka ajanga GHADC election koba April 10 nü agitsü liasü, iba ya thinentüsü.

Lendong timtem talila matalokdaksütsü atema state sorkari Garo Hills district pongu nung mobile internet services shibangtsüogo, ta ketdangsürtemi ashi.

Takum tenla agütsür mang ayangtsü: Mojtaba Khamenei



Tehran, Metsüremi/March 12 (Agencies): Iran indang Supreme Leader akumba sülen linük den mezüngbuba jembidang, takum tenla agütsür indang azü atema mang ayangtsü linüki mamadoktsü, ta Ali Khamenei'er jabaso Mojtaba Khamenei-i ashi.

"Linük asoshi takum tenlar indang azü atema mang ayangtsü asenoki mamadoktsü," ta pai ashi.

Pai kidanger linüktem den tesendaktep alitsü nüngdakba indang jembida aser US bases nung amakba manentsü ta jangjatsü. "Asen kidanger den tesendaktep tajung aliba nung asenoki amanger, saka asenoki America nung alidak amaktsü aser manentsü."

"Asenoki tsükchir nungi taa agitsü, aser aji memulungra, asenoki parnok indang rongsen nungi asen nüngdakba agitsü, aser ajia tamakoktsü

asünungbo, asenoki par rongsek kasa samatsütsü," ta Mojtaba-i ashi.

Nüburtemi defense tajung aser tesasatsü maliba janrar ta Supreme Leader tasenbai ashi.

Mojtaba Khamenei-i Strait of Hormuz ya shibanga ayutsü ta nenshia ashi. "Strait of Hormuz shibangtsü atema hadir wazüka ayutsüla, aser nüngdak dang süra danga fronts tem lapoktsü," ta pai ashi.

Middle East nung linük tekolak ka ama talangtiba inyaksang Ayatollah Ali Khamenei ya rara tenzüknü tepset, kong Tehran nung tir aliba ki nung kongshia liasü.

Iba ya Ramadan tenzüker anogo ter buba liasü aser Khamenei ya Mojtaba indang kinungtsü aser jabaso densema par kinunger den liasü, aser iba mapang US aser Israel lungjemer amakdang parnok tepset.

Tayimtsü amshia amakba nung tebu tepset aser iba mapang Mojtaba ya yiru, ta Iranian ambassador to Cyprus ajanga The Guardian dang Bodhbarnü ashi. "Pa yangji liasü, aser bomb pokloktsüba mapang pa yiru, saka bendanger osang nung ibajibo ni mangu," ta Ambassador Alireza Salarian-i ashi.

US Tir Donald Trump, shibai Iran indang Supreme Leader tasen ka shimtsü tejangraba aliba ama taoba mapang sayua liasü, pai Mojtaba Khamenei ya sunepa melitetsü ta ashi.

Iran indang Supreme Leader ka ama Ali Khamenei'er jabaso Mojtaba shimba mechi Trump-i kanga mepelaba lemsatapa lir.

Fox News den sensaksemba mapang, Iran indang lenir shimba nung pa mepelar ta Trump-i ashi. "Pa sunepa alitsü ta nibo mamanger," ta Trump-i ashi.

Ukraine nung rara aliba Hungarian election nunga kongshir

Budapest, Metsüremi/March 12 (Agencies): Ato Kilonser Viktor Orban aser par Fidesz party-i aruya aliba Hungarian elections nung takok anguba Ukraine-i menokdangtetsü, ta Hungarian sorkari ashi. Ato kilonser aser par kinunger anema rarateptsü, energy installations tongtipang amaktsü mesüra raksatsütsü renema lir, ta minister temi tai tongloktsür.

Ajüsüaka Ukraine sorkaribo Hungary ato kilonser-i Hungarian nung tersübo nung Fidesz nem vote agütsütsü asoshi tasa tamajung inyaker ta ashir.

Tetsüngta nung Russia lir. Orban jenjang tajungba kumdaktsütsü aser opposition Tisza Party aser iba telok lenir Peter Magyar jenjang tamajungba kumdaktsütsü atema Kremlin den sendaktepa aliba media consultancy firm Social Design Agency ajanga Hungary nung osang meshidak prokshitsü renemtar, ta The

Financial Times ajanga Bodhbarnep ashi.

Anogo 30 dang lir Hungary nung parliamentary election agitsü lir, aser Ukraine anema tali puraloka jembiba ajanga Orban ya tamakok ajurutsü tsübobba kuli sayur südi, ta aikati ashir.

Tang tesüsa poll nung par Fidesz party-i vote shilem 39 aser Tisza-i shilem 50 angu.

Orban-i pa indang electorate kanga junga meteta lir, aser linük ya lendong nung lir ta parnok mesüzüktetra, par April 12 election nung ashiteta ponguben buba takok angutsü, ta kari ashir.

Iba mangatettep nung Druzhiba (Friendship) pipeline nung timtem agütsüba ya tiyong lir, kong Hungary aser parnok achayangba Slovak refineries metaloka alir.

January 27 nü Russia indang drone kati Ukraine anüolen Brody oil hub amakba ajanga mi adoka iba pipeline ajanga totzü agütsüba anen.

Iba sülen Hungary dangi totzü marur.

Taoba hopta Orban-i satellite noksa tem sayuba nung iba pipeline shidak dang aliba sayur, ta ashi. Hungary nung totzü agi anüngdakja Orban-i maneni takok anguba maongka agentsü mechi Ukraine-i iba pipeline yanglushiba nung mapang tali agidaktsür ta pa aser par minister temi tai tongloktsür.

Hungary nung Ukraine anema o tali puralokba ya yimya balala nung lir.

Billboards tulu aser city lights posters agi linük sünga lir. Kar nung Ukraine Tir Volodymyr Zelenskyy-i EU lenirtem dang nungi sen meshiba sayur.

Kari Zelenskyy aser Peter Magyar tesendaktep kanga tajung lir ta ashir. Par Tisza ajanga Hungary ya Ukraine rara nung dendaktsütsü asoshi sentong yanglur ta tai tongloktsür, saka Magyar-i khenyongi magizüker.

Office of the **MONGSENYIMTI SENSO MUNG DANG**
 B.P.O MONGSENYIMTI P.O. CHUCHUYIMLANG
 DIST: MOKOKCHUNG NAGALAND-798614

KHONANG NÜNGSANG TEPELA YIMYIM

Tsüngrem akhümtsubua ajemalua litetba maong nung Mongsenyimti lisopur shirnoki taküm luyim wadang balala nung nendaka inyakba aser meranga azüngba nüngtem khonang balala ajangzükta sensosanger ajak numadangtetsu khonang tulu bentsur aruogo, Mongsenyimti Sensosanger Inti tenüng nung Mongsenyimti Senso Mung dang Mendendi ajanga takotet senso ajak nem tetushi tenungsang tulu agutsur;

- Wb. Subonyanger, SE** (Wb. Olemtemjen & Wt. Senlikala jabaso) Additional Chief Engineer, PHE Department, Government of Nagaland, Menden tongtet.
- Kr. Sungjemrenla I. Jamir** (Wb. L Imthy Jamir & Wt. Takamongla Jala) Pharmacist, NPSC tatidang nung ajangzükta.
- Kr. Chubayangla Ozukum** (Wb. Imtichizung & Wt. M. Alemla Jamir jala) Staff Nurse, NPSC tatidang nung ajangzükta.
- Kr. Imkumarno Ozukum** (Wb. Imkongsangba & Wt. Bendangrenla jala) B-Level Basketball Referee jenjang ngutet.

Pei mangdang aser nükjidong nung masetshii kerekereha nokdakteta asen nubur aser alima songtetsongteta tenzükta teyanglur Tsüngremi nenok sempet aser wadangtem molamoshia moaja anitsu sarasademtsur.

Sd/- **Sd/-**
IMOTONG **S.NOKINLEMBA**
President, MSM **Secretary, MSM**

OFFICE OF THE **MONGSENYIMTI METSÜBO TSÜR TELONGJEM**
 MOKOKCHUNG; NAGALAND

TETUSHI AGÜTSÜR

NPSC kübok NPSC-1 CTSE tatidang nung Wb. L. Imthy Jamir & Wt. Takamongla na jala Kr. Sungjemrenla I Jamir-i takok tulu ajangzükta Pharmacists jenjang ngutetba tepela Mongsenyimt Metsübo tsür Telongjem ajanga tetushi agütsür.

Nai takok tajung ngutetba ajanga asen Metsübo tsür nüma tangteta kümdaktsür aser ne sempet tajungji nübur atema temoatsür taküm südakjangma ta asen Metsübo tsüri sarasademtsür.

Sd/- **Sd/-**
Wt. Sentiyula Jamir **Wt. Imtiyangla Jamir**
President **Secretary**

Ethiopia alinen aser tzümetsüng lendong nung nisung 64 asü

Addis Ababa, Metsüremi/March 12 (Agencies): Ethiopia linük south tsütsü Gamo Zone nung alinen aser tzümetsüng lendong nung asür nisung 64 jungogo aser ano nisung aika samar bushir, ta police-i ashi.

"Tawa Gamo zone nung tzümetsüng adokba ajanga nisung samaba 128 jungogo aser tang tesüsa osang sangdongba ajanga nisung tasü mang 64 ngutetogo ta ashir," ta South Ethiopia Regional State Police Commission-i Brehostibarnü Facebook sangdong ka nung ashi.

Gacho Baba district communication chief, Abebe Agena-i ashiba agi, asürtem ya timba mulushi nung nung rema aliba ngutet. Kibong kwi dak kongshiar ano mejangja.

Rescue operation mapang nisung takum ka mulushi nungi atsütet, ta Gamo Zone director of disaster response Mesfin Manuqa-i ashi.

South Ethiopia Regional State tir Tilahun Kebede-i iba lendong asoshi tejashi lemsatap aser nüburtem dang tekong bushia aotsü ajungshi, kechiaser tzünglu aruba manener.

"Tzünglu aruba mapang ka

asünung iba ama lendong ya ano ajurutsü akok, anungji highlands aser tzümetsüng adoktsüba tesemtem nung aliba nüburtem dang nüngdakba mera agitsü ayongzüker," ta pai ashi.

Tzünglu kanga sashia aruba ajanga tzümetsüng adokba nung nisung asür, aser East Africa nung anogo ishika tzümetsüng tesashi adokba angazüker.

Hokulbarnü kidanger Kenya linük indang yimtiba Nairobi nunga tzünglu kanga sashia aruba sülen nisung aika asü.

Ethiopia nung tzünglu tesashi aruba ajanga ali anenba aser tzümetsüng adokba ya kanga bulua lir, aser talisa meyi mapang ajurur.

2024 kum July ita tzünglu kanga sashia aruba Ethiopia south tsütsü alinen tesashi aluba nung nisung 250 dak tema asü.

Tesüiba kum 20 shi East Africa nung tzünglu kanga sashia aruba aser akongba tali akumba bushiteta lir.

Nisung meimchir inyaksangshi ajanga tzümopung melendaktsür ta scientists temi mapang talangka nungi tekumdangtsü shia arur.

UCL: Real Madrid-i goal 3-0 agi Man City akok

Metsüremi/March 12, 2026

(Agencies): Brehostibarnü UEFA Champions League Round of 16 mezüngbuba leg nung Real Madrid-i goal 3-0 agi Pep Guardiola-i aniba Manchester City team koka parnok jenjang kanga junga kümogo. Iba asaya nung Federico Valverde-i asaya mezüngbuba shilem nung hat-trick ka idakja liasü.

Asaya nung Valverde-i mezüngbuba goal ya minute 20buba nung idaktsü aser iba sülen minute tenet dang lir tanabuba goal idakja liasü. Maneni Valverde-isa asayamung mezüngbuba shilem tembangtsü minute asem anunga lia tasembuba goal idakja liasü.

Thibaut Courtois-i ball talang ka agütsüba Valverde-i kanga junga agizüka Gianluigi Donnarumma adena goal metsüoktsüba sülen Spain yimtiba nung amendaker aliba team ya tejakdang kümdaktsü.

Iba sülen box telung nung Vinicius-i Valverde nem ball tajung ka agütsüba sülen Uruguay nunger asayar yagi pa tetsü tabelen agi goal idakja Madrid pur goal 2 agi tejakdang aküm.

Asaya mezüngbuba shilem atemtsü lia Valverde-i ball kanga junga agizüka sülen Marc Guehi bentok aser Italy nunger keeper Donnarumma adena ball metsüokja goal tasembuba idakja liasü.

Kasa mapang nung asaya tanabuba shilem nung Donnarumma-i Vinicius Junior alangdaktsüba sülen penalty metsütsü atema Real nem maongka agütsü koba Vinicius-i metsü saka City keeper yagi nokdanga liasü.

Brehostibarnü tanga asaya ka nung defending Champions PSG puri Parc des Princes nung goal 5-2 agi Chelsea kokogo.

PSG atema Khvicha Kvaratskhelia-i goal ana

idaktsü aser Vinha, Ousmane Dembele aser Bradley Barcola nungeria goal kaka idakja liasü. Chelsea atema goal ana ya Malo Gusto aser Enzo Fernandes nati idakja liasü.

Maneni BayArena nung Arsenal aser Leverkusen na Round of 16 mezüngbuba leg asaya goal kaka agütsür tembanga liasü. Asaya nung Kai Havertz-i asaya tatemtsü lia Gunners atema goal ka idakja asaya draw asü.

Asaya nung mezüngbuba goal ya Robert Andrich-i Leverkusen atema minute 46buba nung idaktsü, ajisüaka Viktor Gyokeres melena aitba sülen Havertz-i goal ka idakja Mikel Arteta-i aniba team yagi point ka ngutetogo.

Asaya tatemtsü lia minute 89buba nung Max Tillman-i box telung nung Noni Madueke alangdaktsüba sülen penalty ka agütsüba Havertz-i aibelen mesüi idakja liasü.

Sweden coach Potter-i tenangzüktepba yanglushi



Metsüremi/March 12, 2026

(Agencies): Taküm World Cup atema qualify asütsü asoshi merangba mapang Sweden coach Graham Potter-i 2030 küm tashi inyaktsü atema tenangzüktepba yanglushiogo. Pai ashiba agi, iba mapa abentsü ya nemdangtsüka aser khuret tulu lir.

Arishi küm 50 tain taoba mapang West Ham, Chelsea aser Brighton coach ya October ita Jon Dahl Tomasson mapa nungi anentsüba sülen mapang tatsüka atema shima liasü.

Sweden team taküm United States, Canada aser Mexico nung June ita asayatsü aliba World Cup nung asayatsü atema timla mesamai lir. Parnoki Ukraine den play-off asaya koka iba sülen Poland mesüra Albania kokra parnok qualify asütsü.

Premier League season junga metenzüktetba sülen Potter ya West Ham puri

September ita mapa nungi anenja liasü.

Ajisüaka pa ya yakta dang Sweden head coach mapa bendaktsütsü asoshi asadangertem rongnung ka aküm, kechiyong pai Ostersund pur linük fourth division nungi top flight tashi ani aser 2017 küm domestic cup-a ka koka liasü.

"Iba mapa maneni inyaktsü maongka anguba ya kü atema kanga tongtibang," ta Potter-i ashiba Swedish Football Association-i metetdaktsü.

"Ni kanga nema adanger aser khuret süa bilemer. Iba ya kü atema anogo tulu ka aser langka tongtibang inyaktsü asoshi maongka tajung ka lir.

"Sweden ya football asaya meimba linük ka lir aser linük team temi tongtibang asayamungtem nung final tonga atuba aser toktepba puti otsü tajung lir, koba dangi onok meyipa oner," ta pai ashi.

Indian Wells: Jack Draper-i Djokovic tsükdaktsü



Jack Draper aser Novak Djokovic na asaya temer salemtepba noksa nung angur.

Metsüremi/March 12, 2026

(Agencies): British nunger tennis asayar aser Indian Wells defending champion Jack Draper-i Brehostibarnü iba asayamung Round of 16 nung Novak Djokovic kokogo.

Draper-i set ka mekoki aliba nungi meyipa tur 4-6, 6-4, 7-6(5) agi Grand Slam 24 ben koker aliba asayar ya koka pa quarterfinal tongtetogo.

Asayar ana set asem asaya aser Draper-i arishi küm 38 tain Serbia nunger nungtugu asayar belemdakja liasü. Djokovic-i 2016 küm iba asayamung akokba sülen tang mezüngbuba Indian Wells nung quarter-finals metongteti tsükogo

"Point ka agi dang tebendang adok. Iba game nung iba point ngutetba tu jangrademtsüka liasü, saka ni kanga belematok," ta Djokovic-i ashi.

"Pai junga masayateti point 5-4 aküm aser asaya repringertemi ni pusema liasü aser iba ajanga tashi agütsü. Anungji ni asaya akoktsü ta

bilemer. Asaya tera agi dang makok," ta Djokovic-i ashi.

Grand Slam 24 koker alisang Djokovic ya Australian Open final nung Carlos Alcaraz makokba sülen tang mezüngbuba asayarba liasü aser tatembangbuba set asayaba mapangbo pa kanga belematok ama repringerteta liasü.

Draper, shiba teka yiruba ajanga ita trok shi masayai lir tang agi tanabuba asayamung nungang asayar, pai drop shot aika asaya-a Djokovic tanen makai asemzüdakja liasü.

Game tekububa nung game akoktsü atema serve asüba mapang Djokovic-i Draper indang serve break asü saka pa asoshi aji teperi masü asü. Iba asaya akokba sülen Draper quarter nung Russia nunger asayar Daniil Medvedev den asayatsü.

"Ni iba asaya ya temlungtetba tulu agi kokogo aser ni takok tashi tajungtiba asayatsü meranga asayaogo," ta

Draper-i ashi.

"Alima nung kü atema tennis asayar tajungtiba Novak den asayashiba atema ni kanga nema adanger," ta paisa shisem.

Kasa asayamung tebur tarep asaya nung India nunger asayar Yuki Bhambri tang mezüngbuba ATP Masters 1000 semifinal kati iogo. Pa indang Swedish partner Goran Goransson den pai Alexander Erler aser Andrea Vavassori na koka liasü.

Arishi küm 33 tain asayar yagi taoba mapang Masters 1000 level nung anaben tashi quarter-final tonga asayar liasü.

Bhambri aser Goransson nati Austrian-Italian tarep ya 6-3 7-6 agi koka liasü. Parnok ghonda ka ser minute 30 dak tema asaya liasü.

Tena semifinal nung France nunger Arthur Rinderknech aser Monaco nunger Valentin Vacherot na den asayatsü. Rinderknech aser Vacherot nati Russia nunger tarep Andrey Rublev aser Karen Khachanov na 6-3 6-4 agi koka liasü.

Asian Weightlifting Championships thinener

Metsüremi/March 12, 2026

(Agencies): Middle East nung tang mepetmesü adoker aliba ajanga 2026 Asian Weightlifting Championships thinenogo. Iba continental asayamung ya Gandhinagar nung April 1 nungi 10 tashi asayatsü liasü.

Ajisüaka USA aser Israel nati anüing ajanga Iran amak tenzüka sülen tang tensa kanga mejungi lir aser ibayongji iba asayamung ya May 12 nungi asayatsü thinenogo.

"Middle East aser Gulf nung mepetmesü adoker aliba ajanga 2026 AWF Asian Senior Weightlifting Championships ya thinener ta Asian Weightlifting Federation (AWF)-i Member Federations aser asayar ajak nem osang agütsür," ta federation-i social media ajanga metetdaktsü.

"Asayar aser parnok minertem ajak tekümzüka kübok kecha tetsüdaktsü

makai iba asayamung asayatsü atema tetoktepba ya 2026 küm May 12 nungi 17 tashi asayatsü," ta kasa sangdong ajanga metetdaktsü.

Asayamung mapanglem:

* 25 April 2026 - Final Verification Online.

* 9 May 2026 -Delegate tem adenshitsü.

* 10 May 2026 - AWF Executive Board Meeting & Anti-Doping Seminar.

* 11 May 2026 - AWF Congress & Opening Ceremony.

* 12-17 May 2026 - Competition Days.

* 18 May 2026 -Delegate tem apusoa aotsü.

Iba asayamung nung asyartem weight class tasen nung tokteptsü, kong teburtem atema 60kg, 65kg, 71kg, 79kg, 88kg, 98kg, 110kg, aser +110kg densema lir, aser tetsürtem atema 48kg, 53kg, 58kg, 63kg, 69kg, 77kg, 86kg, aser +86kg densema lir.

BILEMDANGANG

"Akümstübu sayuba agi nisung ka kecha makoksar."